

No. Rujukan : UTeM.02.03/10.24/1/4/2 (7)



UNIVERSITI TEKNIKAL MALAYSIA MELAKA

SURAT EDARAN PENTADBIRAN

BILANGAN 3 TAHUN 2010

**LARANGAN PENGLIBATAN PEGAWAI
PERKHIDMATAN AWAM DALAM
PERHIMPUNAN AWAM ATAU GERAKAN YANG
MENGANCAM KESELAMATAN NEGARA**

Pejabat Pendaftar
30 Mac 2010

Disalinkan kepada:

Naib Canselor
Timbalan Naib Canselor (Akademik dan Antarabangsa)
Timbalan Naib Canselor (Penyelidikan dan Inovasi)
Pegawai-Pegawai Kanan

SURAT EDARAN PENTADBIRAN BIL. 3/2010

**LARANGAN PENGLIBATAN PEGAWAI PERKHIDMATAN AWAM DALAM
PERHIMPUNAN AWAM ATAU GERAKAN YANG MENGANCAM KESELAMATAN
NEGARA**

Surat ini bertujuan memaklumkan kepada semua staf Universiti Teknikal Malaysia Melaka mengenai keputusan pihak Universiti atas kelulusan Mesyuarat Lembaga Pengarah Universiti Bil. 1 /2010 yang bersidang pada 23 Februari 2010 bersetuju untuk menerima pakai Surat Edaran yang dikeluarkan oleh Jabatan Perkhidmatan Awam Malaysia (JPA) bernombor rujukan JPA(S)TT.71/140/(15) bertarikh 13 Ogos 2009 secara keseluruhannya.

2. Dimaklumkan bahawa penglibatan pegawai perkhidmatan awam dalam perhimpunan haram atau apa-apa bentuk gerakan yang boleh mengganggu ketenteraman awam dan mengancam keselamatan negara berlaku dalam beberapa bentuk, iaitu:

- i) penglibatan secara aktif di luar masa bekerja dengan menyertai apa-apa bentuk gerakan atau perhimpunan haram yang dianjurkan oleh mana-mana pihak;
- ii) menggunakan masa pejabat dan meninggalkan pejabat untuk melihat dan menyertai gerakan atau perhimpunan haram; dan
- iii) menggunakan peralatan pejabat seperti mesin cetak, mesin penyalin, komputer untuk mencetak dan mengedar risalah berkaitan dengan apa-apa gerakan atau perhimpunan haram.

3. Dari segi peraturan, penglibatan pegawai perkhidmatan awam dalam perhimpunan haram atau sebarang gerakan yang boleh mengancam keselamatan negara boleh disabitkan di bawah tiga (3) peraturan berikut iaitu:

i) Peraturan 4(1), Peraturan-Peraturan Pegawai Awam (Kelakuan dan Tatatertib) 1993 iaitu seseorang pegawai hendaklah pada setiap masa memberikan taat setianya kepada Yang di-Pertuan Agong, negara dan Kerajaan;

ii) Peraturan 4(2)(a), (b) dan (c), Peraturan yang sama iaitu pegawai awam tidak boleh membelakangkan tugas awamnya atau berkelakuan dengan apa-apa cara yang mungkin menyebabkan syak yang munasabah bahawa mereka telah membiarkan kepentingan peribadinya bercanggah dengan tugas awamnya sehingga menjejaskan kebergunaannya sebagai pegawai awam; atau

iii) Peraturan 21 (1) dan (2), Peraturan yang sama iaitu mengenai penglibatan pegawai awam dalam politik di mana Pegawai Kumpulan Pengurusan Tertinggi dan Kumpulan Pengurusan dan Profesional dilarang sama sekali mengambil bahagian dalam politik manakala Pegawai Kumpulan Sokongan hanya boleh memegang jawatan dalam parti politik setelah mendapat kelulusan bertulis daripada Ketua Pengarah Perkhidmatan Awam atau Ketua Setiausaha Kementerian mengikut mana yang berkenaan.

4. Ketiga-tiga peraturan di atas bertujuan untuk mempertahankan prinsip '*neutrality*' dan '*impartiality*' dalam perkhidmatan awam. Oleh yang demikian pegawai perkhidmatan awam hendaklah melaksanakan tugas dan tanggungjawab yang diamanahkan untuk memberi perkhidmatan kepada orang awam. Di samping itu peraturan di atas juga berlandaskan konsep integriti bagi memastikan perkhidmatan awam benar-benar merupakan perkhidmatan yang stabil serta berkecuali terhadap mana-mana pihak, kumpulan termasuk gerakan, fahaman dan parti politik.

5. Salinan surat edaran tersebut boleh dirujuk sama ada di laman web Pejabat Pendaftar atau laman web Jabatan Perkhidmatan Awam (JPA) di alamat <http://www.jpa.gov.my>. Surat edaran ini berkuat kuasa serta merta.

Sekian, harap maklum.

"KOMPETENSI TERAS KEGEMILANGAN"

Saya yang menurut perintah

A handwritten signature in black ink, appearing to read 'Hasan', with a stylized flourish at the end.

HASAN BIN SIRUN

Pendaftar

/ukp